

2 Pita

Yän-yäkŋarani äma täŋo man jopi yäpä-siwonŋ takta manbiŋam

1 ¹ Man ŋowä Saimon-Pita näkä kudän täyat. Näk Jesu Kristo täŋo watä epän äma ba aposoro kubä. Täŋkaŋ ämawebe nadäkinik nintä yäpmänŋ kuŋat takamänŋ udegän yäpmänŋ kuŋat täkaŋ inta yänpänŋ man ŋo kudän täyat. Nadäkinik yäyat uwä nadäkinik Anutunin ba waki keriken nanik nimagurani Jesu Kristo unitäŋo täktäk siwonŋi terak yäpumänŋo u. Nadäkiniknin u imaka jopi nämo, unita iyap takinik täk takamänŋ. ²^a Täŋpäkaŋ Anutu ba Ekäninin Jesu Kristo unitäŋo manbiŋam daniŋpänŋ yänpänŋ-nadäk täŋ irirä unitäŋo orakoraki ba bänep pidämtä inken tokŋek-inik pat tamik täyon.

Ninä Anututä inita iwoyänpänŋ nipmaŋkuk

³^b Jesu Anutu ude itkaŋ kehäromini inipärik kubä unitä kehäromi nimiŋ moreŋirän irit kehäromita biŋam itta, ba kudän Anututä ini gäripi nadäk täyak u täŋpeŋ kuŋatta nadäk kädet ätuta wäyäkŋenaŋi nämo. Ude kuŋatneta mebäriini käbop nämo peŋkaŋ wäpi biŋam peŋyänŋek ikek kwawak niwonŋärenŋkuk. Uterak, ba ninta yänpänŋ epän säkgämän kubä täŋkuko uterak inita biŋam yänpäbä nipmaŋkuk. ⁴Ude täŋkuko uwä imaka säkgämän-inik, gwäki ärowani nimikta yänkehärom taŋkuko u nimiŋkuko ubayänŋ. Täŋirän iron uterak kome täŋo nadänŋ gärip ba kaŋgärip waki äma täŋo bänepi täŋpänwak täkaŋ u täga irepmitpänŋ bänep nadäk-nadäkjin Anutu täŋo ude bumik äworek täyak.

⁵Mebäri unitagän kudän siwonŋi mebäri mebäri yäpurärätpänŋ yäpurärätpänŋ täŋpänŋ kuŋat täkot. Nadäkinikjin nikek itkaŋ kudän siwonŋi pewä ahäwäpänŋ kaŋ kuŋarut. Täŋkaŋ kudän siwonŋi terak kuŋatpänŋ kudän siwonŋi Anututä gäripi nadäk täyak unita yänpänŋ-nadäk täk täkot.

^a 1:2 Jud 2 ^b 1:3 1Pi 2:9

6^c Ude tãŋkaŋ irit kuŋat-kuŋatjinta watãni itkaŋ bãrãpi gãnaŋ gwãk pimiŋpãŋ kuŋat tãkot. Ude tãŋkaŋ Anututã iniken kudãn siwoŋi u iŋitpãŋ ini bumikgãn kuŋat tãkot. 7Ude tãŋpãŋ notjiye kowat nadãn imãn tãŋpãŋ iron kãdet bureni pewã ahãk tãyon. 8Kudãn udewani koreŋpãŋ yãpmãŋ kuŋatneŋ. Yãpmãŋ kuŋarirã taŋi tokŋenayãŋ tãkaŋ uwã eruk nadãk Jesu Kristoken nanik yãpuŋo uwã jopi nãmo api tãŋpek. Nãmo, u irit kuŋat-kuŋatjinken bureni ahãŋ-bumbum api tãneŋ.

9Tãŋ, ãma kubãtã kudãn siwoŋi udewani nãmo yãpmãŋ kuŋarayãŋ tãko uwã Anututã kãdet ude kaŋ iwarut yãŋ niwet tãyak u nãmo nadãwãn tumbani yãŋ iwetne. U ãma dapuri tumbani ba dapuri waki ude bumik. U momini biani ãrutpak tãwani unita guŋ tãyak. 10Eruk notnaye, in ãma udewani nãmo ãworeneŋ. Nãmo, Anututã inita biŋam iwoyãŋpãŋ tãmagutkuko unita gwãk pimiŋpãŋ iniken äbot itta epãni kehãromi tãneŋ. Ude tãnayãŋ tãŋo uyaku nadãkinikjin nãmo pewã putãrewãpãŋ tãŋyabãk-ken nãmo api mãneŋ. 11Kãdet ude terak Anututã Ekãninin ba waki kerik-ken nanik nimagurani ãmanin Jesu Kristo tãŋo kaŋiwat yewani paot-paori nãmo u gãnaŋ ärokta api tãniŋ kirewek.

Anutu tãŋo man u bureni

12^d Notnaye, man u nadãkaŋ. Ba Anutu tãŋo man buramiŋpãŋ yãpmãŋ kuŋat tãkaŋ u bureni-inik yãŋ nadãŋpãŋ kehãromigãn inŋit tãkaŋ. Upãŋkaŋ nãk intã man u tãŋguŋ takta gãripi nãmo nadãtat. Unita yãŋpãŋ kadãni kadãni pen api tãwet tãŋpet. 13^e Ŋode kaŋ tãŋpa yãŋ nadãtat; Nãmo kumãŋkaŋ irayãŋ tãyat ude bãnep nadãk-nadãkjin ãneŋi tãŋpidãm takta man u wari wari pen api tãwet tãŋpet. 14^f U imata, nãkã kumãkta kadãni kerãp tãyak yãŋ nadãtat, Ekãninin Jesu Kristotã nãwetkuko ude. 15Unita nãk inken tãwetpãŋ tãwoŋãrek epãn kehãromi tãŋpayãŋ. Ude tãŋpayãŋ tãro uyaku kumãŋirawã man tãwetpãŋ tãwoŋãrek tãk tãyat u juku piŋpãŋ api yãpmãŋ kuŋatneŋ.

16^g In nadãkaŋ; Ekãninin Jesu Kristotã kehãromi nitek äbayãŋ tãyak unitãŋo manbiŋam uku tãwetpãŋ tãwoŋãrek tãŋ yãpmãŋ äbumãŋo uwã ãma tãŋo kobap manpãŋ nãmo tãwetkumãŋ. Nãmoinik, dapunintã Anutu tãŋo wãpi biŋam peŋyãŋjek pãhap ikek uterak ahãŋirãn bureni kaŋkumãŋo unita yãk tãkamãŋ. 17^h Nin kaŋpãŋ nadãŋjitna Anutu Nanintã oraŋ imiŋpãŋ wãpi biŋam iniŋ oretkuk. Tãŋkaŋ Anutu wãpi biŋam sãkgãmãn-inik, inipãrik kubã iranitã Jesu ŋode iwerirãn nadãŋkumãŋ; Ŋowã nanakna bureni, nãkŋaken bãnepna gãmãni-inik. Unita gãripi pãhap nadãk tãyat yãŋ yãŋkuk. 18Man kotãk uwã, pom kudupi uterak iritna kunum gãnaŋ naniktã äpãŋirãn nadãŋkumãŋ.

^c 1:6 Gal 5:22-23 ^d 1:12 Jud 5 ^e 1:13 2Pi 3:1 ^f 1:14 2Ko 5:1; Jon 21:18-19

^g 1:16 Mat 17:1-5 ^h 1:17 Mat 17:5

¹⁹Ude kaŋpāŋ nadāŋkumāŋo unita man profet bianitā yāŋahāwani unita nadākinik bureni tāk tākamāŋ. Unita in imaka, manbiŋam u juku peŋpāŋ nadāŋpāŋ yāpmāŋ kuŋarirā api tāgawek. Profet tāŋo man u topān tāŋo peŋyāŋektā bipmāŋ urani gānaŋ peŋyāŋek tākak ude. Topāntā ijiŋ yāpmāŋ kuŋtāyon kome yāŋek tākak udegān man unitā bāneŋjin-ken peŋyāŋeŋ tamiŋ yāpmāŋ kuŋtāyon guk pāhap wāpi abāyāŋektā kaŋ ahāŋ tamān. ²⁰Tāŋpākaŋ ŋodea nadākinik tāŋput; Imaka kāmi ahākta yāwani profet bianitā yāŋkuŋo u iniken nadāk terak nāmo yāŋahāŋkuŋ. ²¹ⁱ Nāmo, profet man biani kubā āmatā iniken nadāk terak kubā nāmoinik ahāŋkuk. Nāmo, Kudupi Munapiktā bāneŋpi tāŋpidām taŋ yāmiŋirān Anututā man yāmani u yāŋahāŋkuŋ.

Yāŋ-yākŋarani āmata man

2 ^{1j} Bian profet jopi ātu Isrel āmawebe bāmopi-ken itkuŋo udegān in bāmopjin-ken api ahāneŋ. Ahāŋkaŋ Anutu wāpi terak jop manman, nadākinik tāŋpāwak man, u kābop kābop bāmopjin-ken api yāŋahāŋtāŋ kuney. Ba ugān nāmo, Ekāni ārowani suwaŋpāŋ yāmagutkuko unita imaka, māde api ut imineŋ. Ude tānayāŋ tāŋo unita Anututā bārāŋek- inik api tāŋpān waneŋ. ²Tāŋpākaŋ āma māyaptā unitāŋo kādet kuroŋ iwatpāŋ kudān āmatā nāmo tānaŋi u api tāneŋ. Tāŋirā āma nadākinik nāmo tāŋpanitā yabāŋpāŋ man bureni tāŋo kādet unita yāŋpāŋ-yabāŋ yāwat api tāneŋ. ³^k Tāŋpākaŋ āma jopman yāwani unitā monenŋta yabāŋgārip tāŋkaŋ Anutu wāpi terak kobap man mebāri mebāri yāŋ- tākŋarirā moneŋ api yāmineŋ. Ude tānayāŋ tākaŋ upāŋkaŋ yāpmāŋ daniwani āmatā manken yepmakta kādāni bian peŋ yāmiŋkuko unita itsāmāŋtak. Ba yāpmāŋ daniwani āmatā tāŋpāwak tāŋpayāŋ tāko u tāga nāmo api irepmitneŋ.

⁴^l Unita imaka bian ahāwani tāŋo manbiŋam ŋode tāwera nadāwut; Bian aŋero ātutā waki tāŋirā Anututā nāmo yabāŋ koreŋkuk. Nāmo, u geŋi waki, awaŋ bipmāŋ urani gānaŋ uken ureŋ tāŋpān āpmonŋpāpāŋ yen kehāromipāŋ pādāt tāŋpāŋ yepmaŋkuko kādāni pāhapta itsāmāŋkaŋ. ⁵^m Ba udegān āma biani biani Anututā māde ut imiŋirā nāmo yabāŋ koreŋkuk. Nāmo, yāŋirān umetā tokātpāŋ kudup dāpuk. Tāŋkaŋ Noa, Anutu iŋamiken siwoŋi irit kādet tāŋo manbiŋam yāŋahāwani ukāt iniken tawaŋken nanik 7 ugānpāŋ tāŋkentāŋ yāmiŋpāŋ yepmaŋkuk. ⁶ⁿ Ba kubā pen ŋode; Anututā Sodom Gomora āmawebe yabāwān wawāpāŋ yotpārare yarā ukāt āmawebe kudup kādāp pewān pāŋku pat ijiwāpāŋ kādākut āworeŋpeŋ kuŋkuŋ. Ude tāŋkuko uwā āmawebe Anutu māde ut imik tākaŋ unitā kaŋpāŋ ŋode nadākta; Nintā terak udegān api

ⁱ 1:21 2Ti 3:16, 1Pi 1:11 ^j 2:1 Mat 24:11; Jud 4 ^k 2:3 Rom 16:18, 1Te 2:5 ^l 2:4 Jud 6
^m 2:5 Stt 6:1-7:24, 8:18, 2Pi 3:6 ⁿ 2:6 Stt 19:24; Jud 7

ahäj nimek. ⁷ Täj, äma kubä wäpi Lot, Sodom uken itkuko ugänpäj täñkentäj iminjuk. Lot, äma täga uwä ämawebetä kädet kábäñi-inik u täñjirä yabänkañ nadäj bäräp täñjuk. ⁸ Ini uwä äma täga upänkañ kepma kubäkubä ämawebe täño täktäki yäkyäki waki u yabänpäj-nadänkañ bänepi siwonji-ken ägekot pähap nadänjuk, ärowani kudän täk täñkuno unita.

⁹ Eruk unita ñode nadäwut; Ekänitä iniken kudupi ämawebeniye täñyabäk mebäri mebäri-ken nanik täga täñkentäj yämiñpäj yämagut täyak. Täñ, ämawebe waki kädet iwatta gäripi nadäk täkañ u yabäj yäwat itak. Yabäj yäwat ittängän kowata yäpmäk-yäpmäk kadäni-ken kowata api yämek. ¹⁰ Bureni, äma kangärip ba nadäj gärip waki täñpäj kubokäret kädet ämatä nämo tänañi täk täkañ u, ba Anutu täño man iwatpäj gämori-ken kuñatta bitnäk täkañ uwä kowata yäpmäk-yäpmäk kadäni-ken täga nämo api irepmiñneñ. Nämoinik!

Äma uwä äma jop manman yäwani bämopjin-ken itkañ u. U iniken gupi yäpmäj äronpäj iniken gärip ugän iwat täkañ. Täñkañ imaka wäpi biñam ikek kunum gänañ irani u yänärok yäwetta umun kubä nämo täk täkañ. ¹¹ Nadäkañ, añero, äma udeyani yärepmiñ moreñpäj kehäromi niked it täkañ upänkañ Ekäni iñamiken itkañ jop manman terak nämoinik yäniñ wärät täkañ. ¹² U kawut! Profet jopi uwä imaka nämo nadäwä tärek täkañ unita man waki bumta yäk täkañ. U tom ägwäri bumik, nadäk-nadäki nämo. Tom ude, iniken gup täño gärip ugän iwaräntäk täkañ. Tom ämatä yabänpäj däpmäkta yäwani udegän äma uwä paotta biñam täkta yäwani. ¹³ Uwä äma ätuta komi yämik täkañ kowata komi udegän api yäpneñ. Imaka unita gäripi nadäk täkañ uwä kábop nämo peñkañ kepma käron gäripini däpmäj tärekta kudän waki mebäri mebäri wari wari täk täkañ. Ba inkät ketem bok täñnak täkañ unitä äñnak-äñnakjin uwä täñpewä imaka kábäj täwani taräki ude äworek täkañ. Ude täñpäj oretoret täk täkañ.

¹⁴ Täñpäj ugän nämo. U webe yabängärip täñpäj yäwarän täktagän nadäk täkañ. Momi täkta gäripi nadäk täkañ, u däpmäj tärenañi nämo. Ude täñkañ ämawebe nadäkiniki kehäromi nämo udeyani täñyäkñat-pewä momi täk täkañ. Täñkañ äma ätuta nämo nadäk täkañ. Nämoinik, initagän nadäkinik täñpäj iniken gärip däpmäj tärektagän nadänpeñ kuñat täkañ. Unita Anututä api däpmäj morewek. ¹⁵ Kädet siwonjita mäde ut imiñpäj täñgunğun täñtän kuñat täkañ. Uwä Beo täño nanaki wäpi Balam unitäño kädet kuroñ iwat täkañ. Balam uwä monenja yänpäj kädet waki täkta gäripi nadänjuk. ¹⁶ Ude täñtän kuñtäyon donki, man nämo yäk täkañ upänkañ donki kubätä ämatä-yän man iwetpäj Balam ñode kañ-yänjuk; 'Täñgunğun kädet täk täyan u kañ pe! yäk.'

^o 2:7 Stt 19:1-16 ^p 2:9 1Ko 10:13; Jud 6 ^q 2:10 Jud 7-8,16 ^r 2:11 Jud 9 ^s 2:12 Jud 10
^t 2:13 Jud 12 ^u 2:15 Nam 22:7; Jud 11; Rev 2:14 ^v 2:16 Nam 22:28-35

17^w Tānpākaŋ profet jopi uwā ume dapuri kawuk tāwani udewani. Ba gubam mänittä piāŋ äreyāŋ tānpān jopjop kuk tākaŋ udewani. U tāŋkentāk kubā tāga nämo tāneŋ. Unita āma udewanita Anututā yotpārare bipmāŋ urani wakiinik kubā peŋ yāmiŋkuko uken api itneŋ. 18^x U gup yāpmāŋ ärokärok man bumta yāntāŋ kuŋat tākaŋ. Tāŋkaŋ äbot tāŋpani guŋ äbot tāŋo tāktāk kädet waki apigān pewanipāŋ tānyäkŋat-pewā gup tāŋo kaŋgärip kädet mebäri mebäri äneŋi iwat tākaŋ. 19^y U bānep ärik-ärik man ŋode yāwet tākaŋ; Nin niwarān tānayāŋ tāŋo uyaku säkgāmān-inik api itneŋ. Ude yäk tākaŋ upāŋkaŋ iniwā säkgāmān nämo it tākaŋ. Nämo, u imaka tāŋpāwak ikek unita watā epān tāŋ imik tākaŋ. Unita ŋode nadāwut; Imaka kubätä intājukun tāŋ gameko uwā, gāk unitāŋo watā epān āmani jopi ude iren.

20^z Unita āma udewanita ŋode yāwa nadāwut; Bian āma uwā waki keriken nanik nimagurani Ekāninin Jesu Kristo unita nadāŋ imiklinik tāŋirā Jesutā tāŋkentāŋ yāmiŋpāŋ kome terak waki tāktāk kädet kudup yārepmiŋ moreŋkuŋ. Yārepmiŋ moreŋkuŋo upāŋkaŋ äneŋi äyāŋutpeŋ kädet wakiken irirā unitā topmāŋpāŋ yepmāŋitkuk. Eruk āma udewani uwā wakiken bian itkuŋo u irepmiŋpāŋ wakiinik-inik-ken itkaŋ. 21^a Unita kowata wakiinik yāpmākta biŋam. Pengān Jesu tāŋo kädet siwoŋita nämo nadāwā tumbuŋ yāwānāku tāga bumik itkāneŋ. Upāŋkaŋ uwā kädet siwoŋita nadāwā tumbuŋopāŋ äneŋi äyāŋutpeŋ man kudupi yāwetpāŋ yāwoŋārewani u mäde ut imiŋkuŋo unita kowata wakitā wakiinik api yāpneŋ. 22^b Kädet u tāŋkuŋo unita man kubā ŋode kudān tāwani u bureni tāyak; Aŋtā aŋek aŋeŋpāŋ peŋkaŋ äneŋi nak tākaŋ. Ba kubā pen ŋode; But kubā ume ärut imiŋpāŋ pewākaŋ äneŋi kumaŋ pāŋku okā nābā gānaŋ dumāk tākaŋ.

Jesu bureni-inik api äbek

3 1^c Notnaye tāgagāmān, bānepjin-ken nadāk siwoŋi pewā ahākta man kudān intājukun kudān tāŋ tamiŋkuro ukāt kubā ŋo man bian nadāwani u äneŋi yāŋkodak taŋpāŋ tāwetat. 2^d Imaka kāmi ahānayāŋ tākaŋ profet kudupi bianitā yāwani unita äneŋi juku piwut yāŋpāŋ tāwetat. Ba jukuman waki keriken nimagurani Ekāninintā aposoro meni-ken yāŋahāŋ tamiŋkuko unita guŋ tāneŋ yāŋpāŋ man ŋo tāwetat. 3-4^{e f} Tānpākaŋ imaka taŋi intā nadānaŋi u ŋode; Tärektäreŋ kadāni kerāp taŋirān āmatā iniken gärip iwatpāŋ sära man ŋode api yāneŋ; Äbākta yāŋkuko u bureni de? Äbek oratā irā wawāpāŋ kumbuŋ-ken unitā pābā apiŋo itkamāŋ-ken imaka imaka kunum kenta kome ahāŋpāŋ irirān

^w 2:17 Jud 12:13 ^x 2:18 Jud 16 ^y 2:19 Jon 8:34 ^z 2:20 Mat 12:45 ^a 2:21 Luk 12:47-48

^b 2:22 Snd 26:11 ^c 3:1 2Pi 1:13 ^d 3:2 Jud 17 ^e 3:3 1Ti 4:1; Jud 18 ^f 3:4 Ais 5:19; Ese 12:22; Mat 24:48

itkuŋo udegän itkaŋ ŋo yäk. Nämö api äbek! yän api yäneŋ. ^{5g} Ude yäk täkaŋ uwä imaka bian ahänkuŋo unita guŋ taŋpäŋ ukeŋode yän yäk täkaŋ. Upänkaŋ bian imaka inidegän nämö itkuŋ. Anutu täŋo meni jinom terak kunum kenta kome ahänkumän. Täŋkaŋ Anututä yänpewän kometä ume gänaŋ nanik kwawak abäŋpän ume bämopi-ken itkuk. ^{6h} Täŋkukopän mäden Anututä ini äneŋi yänjirän ume tokŋeŋpän kome biani u kudup peŋ awähutkuk. ⁷Eruk apiŋo kunum kenta kome udegän Anututä yänjirän itkamän. U jop nämö itkamän, u kädäptä ijiŋ paotta biŋam itkamän. Yäpmän danik-danik kadäni-ken kunum kenta kome-kät ämawebe Anututa mäde ut imik täkaŋ u kudup api paot moreneŋ.

⁸ⁱ Unita notnaye tägagämän, imaka ŋodeta nämö guŋ täneŋ; Ekänitä kadäni nämö danik täyak. Unitäŋo nadäk-nadäkken kepma kubä uwä obaŋ 1,000 ude bumik. Täŋpäkaŋ obaŋ 1,000 uwä kepma kubä ude. ^{9j} Kadäni nämö danik täyak unita ŋode yänaŋi nämö; Api äbek yän yänkukopän bäräneŋ nämö äbatak. Eruk bäräneŋ nämö äbatak uwä mebäri ŋodeta; Ekänitä äma ba webe kubätä paot-paotta biŋam täkta gäripi nämö nadatak. Kuduptagän bänepi äyänutpän näkken äbut yänpän nadäŋ tamiŋkaŋ kwikinik itsämänktak.

^{10k} Upänkaŋ Ekäni täŋo Kadäni u, iwantä äbäk täkaŋ ude, pit kubägän api ahäwek. Täŋjirän kunum mämä yänawat pit kubägän api paorek. Ba imaka imakani u gänaŋ itkaŋ u kädäptä api ijiŋ morewek. Täŋkaŋ kome ini ba imaka imakani u terak itkaŋ u kudup udegän api paotneŋ. ¹¹ Kädet ude terak imaka päke u kudup api paotneŋo unita in irit kuŋat-kuŋat kädet jidewani upän iwatneŋ? Uwä ŋode; Inäwä irit kuŋat-kuŋatjin kudup Anututa imiŋ moreŋpän kädet siwoŋi, Anututä iniken ugänpän iwat täkot. ^{12l} Kädet ude kuŋatkaŋ Anutu täŋo kadäni pähaptä bäräneŋ ahäwän yänkaŋ dapun käroŋ täŋpän itsämänktak. Nadäkaŋ, kadäni ugän kunum api ijiŋ paorek ba imaka imaka kunum terak itkaŋ u kudup api mutneŋ. ^{13m} Upänkaŋ ninäwä imaka Anututä nimikta yänkehäromtak man yänkuko unita itsämänkamän. Uwä kunum kenta kome kodaki, irit kuŋat-kuŋat kädet siwoŋitä tokŋeŋ pärekta yäwani u.

Ket nadänpän Ekänita itsämänkäna

¹⁴Eruk notnaye, kadäni pähap unita itsämänjit itsämänjit Anutu injamiken momi nämö, siwoŋi kuŋatta gwäk pimiŋpän kuŋat täkot. Täŋkaŋ Anutu-kät bänep kubägän itpän kuŋatta epäni täk täkot. ¹⁵ⁿ Unita ket nadäwut; Anututä ämawebe bänepi äyänutpän inita biŋam täkta unita yänpän itsämänktak. Man u kudupi nämö. Anututä notninpak

^g 3:5 Stt 1:6-9 ^h 3:6 Stt 7:11-21, 2Pi 2:5 ⁱ 3:8 Sam 90:4 ^j 3:9 Hab 2:3, 1Ti 2:4

^k 3:10 1Te 5:2; Mat 24:29,35 ^l 3:12 Ais 34:4 ^m 3:13 Ais 65:17; Ais 66:22; Rev 21:1,27

ⁿ 3:15 Rom 2:4, 2Pi 3:9

Polta man kädēt u iminjirän yänpäj kudän tänpäj tamiŋkuko u udegän. ¹⁶ Poltä manbiŋam kubäkubä kudän täk täyak uwä man u nikekgän. Bureni, Pol täŋo manbiŋam ätu mebäri nadäna tumäkta pipiri täk täkamäj. Unita äma ätu bänep nadäk-nadäk kubägän nämo injirani, ba Anutu täŋo man burenita nämo nadäwä tumbanitä Pol täŋo man ätu yäpmäj äyänutpäŋ goret yäŋahäk täkaŋ, ba Anutu täŋo man ätuta täk täkaŋ udegän. Ude täk täkaŋ uwä paotta biŋam.

¹⁷ Upänkaŋ notnaye, kudän udewani kämi api ahäwek yäj uku nadäk täkaŋ unita injinta ket nadänpäj kuŋat täkot. Tänyäkŋarani äma, Anutu täŋo man tänpäwawani unitä täŋ-täkŋarani tänpäj man jopi täwerirä nadäkinikjin kehäromi u pewä putärewäpäŋ säkgämän itkaŋ u irepmitpäŋ wakiken äpmonerŋa! ¹⁸ Tänpäkaŋ Jesu Kristo u Ekäninin ba waki keriken nanik nimagurani. Unitä orakoraki tamik täyak unitäŋo mebäri, ba iniken täktäkita yänpäj-nadäk tänpäj nadäwä tumbäpäŋ kehäromigän kaŋ irut. Tänpäkaŋ wäp biŋam ärowani, peŋyäjek ikek ba inijoret man kudup Jesu Kristoken tärek-täreki nämo it yäpmäj kuk täyon. U bureni!

° 3:17 Mak 13:5,33, 1Ko 10:12 P 3:18 Jud 25